

金石錄

五

全

正

集

卷

金石錄卷第二十五

跋尾十五 唐

偽周

唐褚亮碑

唐洛州刺史賈公清德頌

唐歐陽詢妻徐夫人墓誌

唐襄州刺史封公碑


唐襄州孔子廟堂碑

唐奉禮郎岑子輿墓誌

唐醴泉縣令張仁蘊德政碑

周武后昇中述志碑

周武后封中嶽碑



周昇仙太子碑

周大雲寺碑

周武士護碑

周孔昌寓碑

周崔敬嗣墓誌

唐祝府君碑

唐秦州都督唐宗碑

唐工部尚書姚璿碑

後周宇文舉碑

唐魏叔瑜妻王夫人墓誌

唐兵部侍郎崔兢墓誌

唐中興聖教序

唐聖教序碑側

唐徐有功碑

唐國子祭酒武承規墓誌

唐陝州刺史劉延景碑

唐脩封禪壇記

唐褚亮碑

右唐褚亮碑唐書云亮杭州錢唐人而碑六晉南遷家  
于丹陽按元和姓纂自有錢唐褚氏與亮族系不同唐

史蓋失之

唐洛州刺史賈公清德頌

右唐洛州刺史賈公清德頌按唐史循吏傳賈敦頤敦實相繼為洛州刺史有惠愛郡人皆為刻石號棠棣碑今敦實之碑亡矣此碑載洛州制書有云三川之境是稱都會六條之寄允華時英蒲州刺史賈敦頤體業強正識用優敏蓋其名乃敦頤也又武后實錄敦實傳中亦作敦蹟以此知唐史傳寫之誤又按法書要錄此碑王知敬書以知敬所書他石刻較之字畫不類未知果知敬書否也

唐歐陽詢妻徐夫人墓誌

右唐歐陽詢妻徐氏墓誌云徐始以夫恩封渤海郡君  
尋加渤海郡夫人最後以子恩封渤海太縣君按本朝  
之制婦人既封郡君或郡夫人再以子貴加恩則直封  
為郡太君郡太夫人不復為縣太君矣今徐既以夫貴  
封夫人後以子恩纔封為太縣君蓋一時之制如此又  
不曰縣太君而曰太縣君與今名號亦異也唐世婦人  
封邑次叙史家不載偶見于此志尔

唐襄州刺史封公碑

右唐襄州刺史封公碑宋之慈書字畫頌佳之慈之問

弟也兄弟皆小人之慙奴事武三思三思五狗之慙乃其以此知書特小技苟非其人亦何足貴哉

唐襄州孔子廟堂碑

右唐襄州孔子廟堂碑于敬之撰其前題魯大司寇贈太師宣尼父孔丘廟堂碑銘春秋之法或書字或書名皆所以寓褒貶之意今敬之為孔子廟碑而斥其名何哉

唐奉禮郎岑子輿墓誌

右唐岑子輿墓誌云君諱子輿字安道南陽棘陽人也曾祖之象祖文本父曼倩按元和姓纂及新唐書宰相世系表載曼倩四子獻義仲翔仲休而無子輿今墓誌云



次第獻前太子典膳郎次弟羲前成均監主簿而無仲  
翔仲休墓誌既云獻羲等則不載仲翔仲休容有之惟  
子輿乃舅倩長子姓纂與世系表當書而闕者何也

唐醴泉縣令張仁蘊德政碑

右唐醴泉縣令張仁蘊德政碑長壽三年立醴泉尉顏  
真知書按魚公雖嘗爲此官然在開元間而魯公以貞  
元元年爲李希烈所害年七十六上距長壽二年實九  
十餘歲是時猶未生也又筆法與魯公他書不類以此  
疑有姓名同者然碑武后時立而不用當時所製字或  
云碑雖建於長壽中至魚公爲尉重書而刻之未可知

也據新史紀傳魯公以貞元元年被害年七十七而舊史德宗實錄皆去及於興元元年生年七十七疑新史誤

### 周武后昇中述志碑

右周武后昇中述志碑武后自撰睿宗書碑極壯偉立於嵩山之巔其陰鍾紹京書字畫皆工妙政和中河南尹上言請碎其碑詔從之

### 周武后封中嶽碑

右周武后封中嶽碑已殘缺書撰人名氏皆不可考然驗其筆蹟蓋薛稷書也

### 周昇僊太子碑

右周昇仙太子碑武后撰并書昇仙太子者王子晉也  
是時張易之昌宗兄弟方有寵諂諛者以昌宗為子晉  
後身故武后為葺其祠親銘而書之其碑君臣宣淫無  
耻類如此可發萬古之一笑也

### 周大雲寺碑

右周大雲寺碑賈膺福撰并八分書其筆法精妙可喜  
按舊唐史去武后鑄九鼎圖寫山川物象命工書人賈  
膺福薛昌容李元振鍾紹京等分題之紹京之書世固  
多有膺福筆跡雖僅存然世亦未有稱之者如昌容等  
書遂不復見以此知古所以自著于不朽者果在德而

不在藝也

周武士護碑

右周武士護碑武后時追尊士護為無上孝明皇帝命李嶠為碑文相王旦書石焉戎幕閑談載李德裕言昔為太原從事見公牘中有文水縣牒稱武士護墓碑元和年忽失龜頭所在碑上有武字凡十一處皆鐫去之碑高大非人力所及未幾武元衡遇害今此碑武字最多皆刻畫完好無訛缺者以此知小說所載事多荒誕不可信類如此

周孔昌寓碑

右周孔昌寓碑載其世系甚詳云宣尼父三十六世孫也十四世祖潛吳侍中生晉豫章太守竺竺生大尚書冲冲生大司農侃侃生祕書監滔滔生江夏太守俟俟生宋尚書左丞幼幼生尚書右丞遙之遙之生中書侍郎曩曩生齊散騎常侍珮珮生梁侍中休源休源生陳黃門侍郎宗範宗範生陳散騎常侍伯魚伯魚生隋祕書正字德紹德紹生昌寓唐以前士人以族姓為重故雖更千百年歷數十世皆可攷究自唐末五代之亂在朝者皆武夫悍卒於是譜牒散失士大夫茫然不知其族系之所自出豈不可惜也哉故余詳錄于此使後學

論姓氏者有考焉按此碑及梁史皆云休源仲八世孫而元和姓纂獨以為七代孫誤矣

### 周崔敬嗣墓誌

右周崔敬嗣墓誌云祖咸考表而元和姓纂以咸為誠表為儀表又新唐書崔光遠傳中宗在房州官吏多不為禮光遠祖敬嗣為刺史獨盡誠推奉帝德之及反正有與敬嗣同姓名者每擬官帝輒超拜後召見悟非是訪敬嗣已死即授其子汪五品官汪生光遠今以墓誌考之敬嗣武后時實為房州刺史然墓誌載敬嗣長子悅次子協而無名汪者而姓纂亦云悅生光遠然則以

悅為汪蓋史誤也敬嗣卒于證聖元年中宗反正其歿  
已久屢遷他人官而不悟可謂昏矣

唐祝府君碑

右唐祝府君碑府君諱絳欽明父也碑欽明自撰今南  
京有漢祝睦兩碑其一言君兆自黎辛祝融苗胄其一  
言其先高辛余按諸書重黎祝融皆帝高陽之後帝堯  
高辛之子也睦碑既云出於重黎祝融又云出於高辛  
自相抵牾莫可究考而此碑引世本氏姓篇云祝氏軒  
轅之後也史記周本紀武王克殷封黃帝之後於祝帝  
堯之後於荊樂記云封黃帝之後於荊帝堯之後於祝

蓋以黃堯末一字闕同出有熊由此史傳相交伊前云舉  
參考世本馬遷近之然司馬遷史記於族系多采世本  
不知世本果可盡信否蓋君子於學有所不知闕焉可  
也

### 唐秦州都督唐宗碑

右唐唐宗碑云君諱宗字徵仁而唐書宰相世系表云  
名世宗碑又云祖諱子政而世系表作二政皆當以碑  
為正宗宰相休璟祖也仕隋為朔方郡丞行郡守事大  
業末為賊梁師都所殺神龍中贈秦州都督

### 唐工部尚書姚璿碑



右唐姚璿碑按新唐書璿列傳云為夏官侍郎坐族弟敬節叛貶桂州長史而碑云自兵部侍郎以敬節犯法改授司府少卿檢校定州刺史尋別真轉都督廣循等二十三州諸軍事廣州刺史後替還仍以前累重貶桂州又璿為宰相時嘗為西京留守而史不載璿以媛妾譎諛事武后其事蹟皆不足取而於官秩闕漏不可不記者所以正史官之失也璿微時所歷官列傳尤簡略今皆不復載云

後周宇文舉碑

右後周宇文舉碑盧思道撰神龍中其曾孫敏進建以

後周書考之官閥事迹多同惟碑云公諱舉字神舉而史但言名神舉而已又史云其曾祖名求男而碑止言名求史云祖名顯和而碑止言名和亦皆不同其卒也史云宣帝以宿憾殺之而碑稱遘疾薨疑作碑者為諱其事當以史為正

唐魏叔瑜妻王夫人墓誌

右唐王夫人墓誌夫人魏叔瑜妻華之母也誌無書撰人姓名驗其筆法蓋華自書華以草隸擅名一時然石刻見于今者絕少此誌世尤罕傳云

唐兵部侍郎崔兢墓誌

右唐崔兢墓誌云公諱兢字明慎祖敦禮父守業案舊唐書敦禮列傳云孫貞慎神龍初爲兵部侍郎元和姓纂新史宰相世系表所書亦同今以墓誌考之其家世及名位皆合惟不著其名而以明爲貞者皆唐史及姓纂之闕誤也

唐中興聖教序

右唐中興聖教序中宗爲三藏法師義淨所作唐奉一書刻石在濟南長清縣界四禪寺寺在深山中義淨真身塔尚存余屢往游焉得此文入錄案御史臺記奉一齊州人善書翰武后時爲御史後坐誅將車疾廢

唐聖教序碑側

右唐聖教序碑側云則天嘗得玉冊上有銘十二字朝  
野不能識義淨能讀其文曰天冊神皇萬歲忠輔聖母  
長安證聖元年五月上之詔書褒荅案宋莒公紀年通  
譜武后以證聖元年九月受天冊金輪聖神之號故大  
赦改元先是司籙局人於水際得石函有玉冊云神皇  
萬忠輔聖母長安故改元協瑞其文與義淨所載小異  
云余嘗謂義淨方外之人而區區爲武后稱述符命可  
笑也然陶弘景號稱一代高士在梁武時亦屢上圖讖  
豈獨義淨哉

唐徐有功碑

右唐徐有功碑徐彥伯撰以新舊唐史考之其本末皆同惟舊史云長安二年卒年六十二碑云三年卒年六十八新史亦年六十八與碑合

唐國子祭酒武承規墓誌

右唐武承規墓誌蘇頲撰顏魯公家廟碑載魯公之父名惟貞字叔堅嘗為太子文學今此誌題太子文學顏叔堅書豈非以字行乎家廟碑又稱叔堅受筆法于舅殷仲容氏特以草隸擅名云

唐陝州刺史劉延景碑

右唐劉延景碑延景女為睿宗妃生讓帝者碑云夫人房氏以景雲元年贈沛國夫人二年歲次丁亥祔窆于延景之墓按睿宗以景雲元年六月即位改元歲次庚戌明年歲在辛亥而碑作丁亥誤也碑載延景四子溫玉承顏瓊琪而元和姓纂以瓊為瑗蓋姓纂之謬

唐脩封禪壇記

右唐脩封禪壇記賈膺福書初余得膺福八分書大雲寺記愛其筆法後又得此記字為小楷尤工妙可喜云

金石錄卷第二十六

跋尾十六

唐并州長史崔敬嗣碑

唐贈右僕射王洎碑

唐雋州都督姚懿碑

唐盧懷慎碑

唐琅邪王冲墓誌

唐玄元觀尹尊師碑

唐河侯新祠頌

唐郭知運碑

唐大雲寺淨院碑



唐六公詠

唐涼國長公主碑

唐衛尉正卿泉君碑

唐左驍尉大將軍趙元禮碑

唐王方翼碑

唐龍角山紀聖銘

唐冠軍大將軍臧懷亮碑

唐蕭灌碑

唐楊曆碑

唐汝陽王長女墓誌



唐南嶽真君碑

唐立梁宣帝明帝二陵碑

唐孝義寺碑陰記

唐景陽井銘

唐代國長公主碑

唐趙冬曦祭仲山甫文

唐解琬碑

唐贈兗州都督裴守真碑

唐屯留令邢義碑

唐并州長史崔欽嗣碑

右唐崔敬嗣碑按唐史崔光遠傳中宗在房州光遠之  
祖敬嗣為刺史盡誠推奉帝德之及反正有與敬嗣同  
姓名者每擬官輒超拜後召見悟非是訪真敬嗣已死  
乃用其子余集錄有光遠祖墓誌其卒在武后朝此碑  
敬嗣蓋中宗時誤遷官者也而碑乃云景龍元年有制  
追不時至中宗對宰相稱其姓名三令使者趣之及謁  
見即日拜羽林將軍二說不同豈中宗既召見乃悟其  
非是歟

唐贈右僕射王洎碑

右唐王洎碑洎王仁皎父也元和姓纂唐書宰相世系

表皆云名文洎而碑云名洎字文洎云

唐雋州都督姚懿碑

右唐姚懿碑懿崇父也據碑及唐書宰相世系表皆云公諱懿字善意而崇子奕碑與元和姓纂乃云名善意豈非以字行乎懿隋末唐初人仕至雋州都督開元間崇為宰相立此碑

唐盧懷慎碑

右唐盧懷慎碑蘇頲撰其叙懷慎官闕甚略云公諱懷慎字懷慎而史不載其字又云上因游鄠杜北望京闕歸然有公之別廬抵其宅室甚陋據此所書乃明皇嘗

親幸其第而史去馳使問之非也史去懷慎厲疾宋璟  
盧從愿候之臨別執二人手曰上求治切然享國久稍  
勸于勤將有儉人乘間而進矣蓋謂揚李也果如此懷  
慎可謂先見然獨新史有之舊史不載按懷慎以開元  
四年卒是時明皇新即位登用賢俊銳于為治之時也  
乃曰享國久倦于勤何哉疑初無此事蓋唐史喜取小  
說所載故事多謬誤以此知是非去取秉史筆者豈可  
不慎

唐琅邪王冲墓誌

右唐琅邪王冲墓誌冲越王貞子也中宗遷房陵貞與

冲謀反正舉兵未幾父子皆敗開元六年始詔陪葬昭陵武后革命毒流海內而唐之宗室被禍尤甚冲父子特畏誅翦故舉兵爾非有他謀也倉卒無援卒就夷滅哀哉

唐玄元觀尹尊師碑

右唐尹尊師碑郭謙光八分書謙光八分初不見稱于唐人獨歐陽公盛稱之以謂不減韓蔡史李四家余因訪求久之得崔敬嗣及此碑著錄焉

唐河侯新祠頌

右唐河侯新祠頌秦宗撰古河伯姓馮名夷字公子潼

鄉華陰人也按章懷太子張衡傳注引聖賢家墓記亦云馮夷者引農華陰潼鄉隄首里人服八石得水仙為河伯又引龍魚河圖曰河伯姓呂名公子夫人姓馮名夷三說雖異然其為無所稽據則同也嗚呼自古荒誕之說惑人雖聰明之士猶或不免况庸人乎

### 唐郭知運碑

右唐郭知運碑蘇頲撰知運有兩碑其一張說文唐書知運傳載其子二人曰英傑英乂而蘇張二公所為碑書其子四人曰英傑英竒英協英彥而無英乂歐陽公疑焉以謂英竒等三子在唐不顯史家闕漏尚或有之

英又嘗為西川節度使其事甚著史官不應差其世家而蘇張二公作銘在知運卒後不遠亦不應闕其子孫莫可究其孰失余按代宗實錄云英又知運季子而元載所為英又墓碑亦云隴右節度使知運公之皇考也然則英又為知運子無疑又案英又碑云公以天寶二載筮仕蓋知運以開元九年卒明年立碑碑所載諸子皆已有名位英又時方孩幼且未從仕故碑不載尔余又嘗得徐浩所為英傑碑有云穆孝於忠二葉四將齊名當代同氣十人然則知運諸子碑傳闕漏者尚多不獨此三人而已

德宗實錄又有邪英翰云英義弟也

唐大雲寺禪院碑

右唐大雲寺禪院碑李邕撰并書初武后時有僧上大雲經陳述符命遂令天下立大雲寺至開元二十六年詔改爲開元寺此碑十一年建故猶稱大雲也

唐六公詠

右唐六公詠李邕撰胡履虛書初余讀杜甫八哀詩云朗詠六公篇憂來豁蒙蔽恨不見其詩晚得石本入錄其文詞高古真一代佳作也六公者五王爲一章狄丞相別爲一章云

唐涼國長公主碑



右唐涼國長公主碑蘇頲撰明皇書公主睿宗女也新  
唐書列傳云字華莊而碑云諱堯字花粧傳云下嫁薛  
伯陽而碑云嫁溫彥博曾孫曦按新史睿宗弟三女荆  
山公主已嫁薛伯陽當以碑為正

唐衛尉正卿泉君碑

右唐泉君碑泉君者高麗蓋蘇文之孫泉男生之子也  
高宗時與男生同歸朝仕為衛尉卿按唐書及元和姓  
纂皆云名獻誠今此碑乃云諱寔字行於代而闕其字  
不書文姓纂云獻誠生玄隱而碑但云名隱而已獻誠  
出於夷虜事跡無足考究錄之以見史傳所載名異同

尔

唐左驍衛大將軍趙元禮碑

右唐趙元禮碑潘肅撰元禮趙麗妃之父本山東倡也  
明皇在潞麗妃以倡得幸後生太子瑛開元初元禮父  
子皆超遷至顯官其卒贈越州都督謚曰忠詔為立碑  
稱述甚盛夫爵祿天下公器所以待有德與功者雖人  
主不得而私焉明皇昵於內寵擢用匪人至為賜謚立  
碑尊寵如此使天下之士亦何所勸乎論者徒知明皇  
自天寶以後綱紀廢弛卒致播遷之禍不知其衽席無  
別履霜不戒所從來久矣

唐王方翼碑

右唐王方翼碑張說撰其事與唐書列傳皆合以校余家所藏燕公集本不同者二十餘字皆當以碑爲是也

唐龍角山紀聖銘

右唐龍角山紀聖銘明皇撰按高祖實錄武德三年四月辛巳晉州人吉善行於羊角山見白衣老父乘白馬朱鬣謂善行曰爲吾語唐天子吾爲老君汝祖也今年平賊後汝當爲帝天下太平必得百年享國子孫且千歲太宗遣使者杜昂致祭瀕吏神復見謂昂曰歸語天子我不食何煩祭爲高祖異之立廟于其地後善行朝

散大夫據碑稱是時太宗爲秦王討宋金剛所謂賊平  
汝當爲帝者指太宗也其事可謂恠矣然碑與實錄所  
載語頗不同文多不能備錄惟碑稱善行以武德三年  
二月初奉神教至四月老子又見曰石龜出吾言實旣  
而太宗遣昂善行乘駟表立至長安適會郇州獻瑞石  
如龜文曰天下安千萬日而實錄亦云郇州獻瑞石有  
文曰天下千萬其語小異又碑稱善行絳州人而實錄  
云晉州尔老子其生以清淨無爲爲宗豈身沒數千歲  
而區區爲人稱述符命哉蓋唐太宗初起託以自神此  
陳勝所謂卜之鬼者也史臣旣載于實錄明皇又文之

于碑遂以後來爲真可欺罔豈不可笑也哉

唐冠軍大將軍臧懷亮碑

右唐臧懷亮碑李邕撰并書臧氏世墓在耀州三原有數碑余盡得之元和姓纂云懷亮生希讓爲渭北節度使此碑具載懷亮諸子無名希讓者以余家所有顏魯公書懷恪碑考之希讓蓋懷恪子云

唐蕭灌碑

右唐蕭灌碑張說撰云灌爲內直監以外艱去職當免喪不就祥縞不撤几筵者久之夫禮爲可傳也爲可繼也子路有姊之罌可以除之矣而弗除也孔子曰何弗

除也子路曰吾寡兄弟而弗忍也孔子曰先王之制禮行道之人皆弗忍也子路聞之遂除之灌父喪當除其母無恙而過時不釋服不撤几筵豈禮也哉

### 唐楊曆碑

右唐楊曆碑題云義男光祿大夫前中書令上柱國越國公太子右諭德潁川鍾紹京撰銘并書曆中官楊思勗父也紹京出于胥史無他才能特以夤緣附會致位宰相固無足道者然屈于閹豎至以父事之而天著之金石略無愧耻亦甚矣書之可以爲後來之戒而新舊史皆闕焉故余詳錄之于此者有以見小人苟可以得

利無不為也

唐汝陽王長女墓誌

右唐汝陽王長女墓誌寧王撰唐史及諸書汝陽王名皆為璉而此誌獨作淳志寧王自作不應差誤案寧王諸子與玄宗子名皆從玉疑汝陽先名淳後改為璉唐史不載耳

玄宗諸子名初皆從水後改從玉也

唐南嶽真君碑

右唐南嶽真君碑有別駕賞紫金魚袋光大睦歐陽公大賞紫蓋今借紫之比余按唐制自有借紫借緋而又賞紫賞緋蓋以軍功被賞者耳

唐立梁宣帝明帝二陵碑

右梁宣帝明帝二陵碑開元二十一年其裔孫高道建  
其前題銀青光祿大夫黃門侍郎同中書門下平章事  
而姓名已殘缺按唐紀開元二十一年韓休實爲此官  
然則此碑乃休之文也碑後題金紫光祿大夫行光祿  
卿駙馬都尉而姓名亦殘缺者蓋高之子衡也

唐孝義寺碑陰記

右唐孝義寺碑陰記初陳徐陵爲孝義寺碑至開元二  
十三年徐嶠之爲湖州刺史撰書而刻之因記其事于  
碑陰嶠之自去陵十世孫按陳書陵以後主至德元年



卒距開元二十三年才百五十餘年不應已有十世孫  
又據嶠之父高行先生碑去曾祖儼梁岳陽王叅軍則  
是儼與陵同時而在其前不應為陵五世孫以此碑陰  
所書可疑然其筆法精妙非嶠之不能為特恐書碑時  
誤耳

### 唐景陽井銘

右唐景陽井銘文字摩滅後有記開元中江寧縣丞王  
震撰震所撰記其前以為序稱余莫知誰也其末乃云  
蓋隋煬帝之所製耳然則未知果煬帝所製乎歐陽文  
忠公曰煬帝躬自滅陳自見叔寶事又嘗自銘以為戒

如此及身為姪玃則又過之豈所謂下愚矣後晉哉余  
以謂煬帝躬賊其父而奪之位其凶忍狂悖人神之所  
憤疾死蓋晚矣至於長惡不悛以亡其國乃所當然又  
何足議焉

唐代國長公主碑

右唐代國長公主碑云公主睿宗第四女也新唐史以  
為第五女蓋史誤碑云公主壻鄭萬鈞撰

唐趙文曦祭仲山甫文

右唐趙文曦祭仲山甫文開元二十三年文曦為濮州  
刺史因明皇耕籍田致祭刊此文焉按樂史寰宇記仲

山甫墓在雷澤縣西北一里墓前有祠堂石室而鄆道  
元注水經成陽堯陵北二里有仲山甫墓考地驗狀咸  
爲踈僻蓋聞疑書疑耳余嘗得其石室畫像上有八分  
書題云君爲從事時以字畫及衣冠人物驗之乃東漢  
時所爲決非山甫墓漢末仲氏爲成陽大族堯母碑陰  
題名數十人皆仲氏而廷尉定以下三碑尚存廷尉碑  
云聖漢龍興家于成陽孟府君堯廟碑云惟仲氏祖統  
所出本繼於成周之胄苗天生仲山甫翼佐中興宣平  
功遂受封於樊周道衰微失爵亡邦後嗣乖散不相土  
譯居帝堯萌兆生長葬陵在於成陽聖化當

之盛樂風俗之美遂安處基業屬都鄉高相仲氏仲  
焉蓋後人因仲氏葬于此遂誤指為仲山甫墓其實非  
也

### 唐解琬碑

右唐解琬碑琬武后中睿朝為將有功新舊史皆有傳  
所書事跡終始與碑多合惟碑與舊史皆云琬以開元  
六年卒而新史以為卒于五年者誤也

### 唐贈兗州都督裴守真碑

右唐裴守真碑守真曾祖景周富平令祖正長平郡  
贊持考脊鄴令新唐史宰相世系表亦云景生正隋散

騎常侍正生脊字歸厚為鄴令而元和姓纂乃云正上歸厚歸厚生脊者誤矣惟守真及其子耀卿碑皆云正為長平郡贊治而世系表言為散騎常侍又云脊字歸厚不知何所據也

唐屯留令邢義碑

右唐邢義碑義邢和璞父也元和姓纂云和璞父名思孝為豐州都督而碑乃云公諱義字思義仕為屯留令又姓纂云後魏光祿卿邢虬虬生臧臧孫玄功玄功生思孝思孝生和璞而碑乃云玄助之祖名子良皆當以碑為據

金石錄卷第二十六

金石錄卷第二十七

跋尾十七

唐八馬坊碑

唐忠武將軍王暕墓誌

唐淄州開元寺碑

唐吏部尚書楊仲昌碑

唐唐儉碑

唐龍門石龕像銘

唐金仙長公主碑

唐雲麾將軍李秀碑

唐嵩陽觀紀聖德頌

唐駙馬都尉豆盧建碑

唐陳隱王祠堂記

唐崔潭龜詩

唐貞一先生廟碣

唐陳留尉劉飛造像記

唐棟王墓誌

唐金城寺放生池碑

唐多寶塔感應碑

唐滎陽王妣朱氏墓誌

唐武部尚書楊珣碑



唐宇文顥山陰述

唐永陽郡太守姚奕碑

唐雲門山投龍詩

唐志歸臺銘

唐渭南令路公遺愛表

唐呂裡祠廟碑

唐呂公表

唐玉真公主墓誌

唐京兆尹鮮于仲通碑

唐慧義寺彌勒像碑

唐八馬坊碑

右唐八馬坊碑郝昂撰開元之治盛矣監牧之制其詳如此錄之可以見當時之制焉

唐忠武將軍王暕墓誌

右唐王暕墓誌云父遂古皇駙馬都尉潁州刺史尚高安公主高宗大帝之女也按唐書高宗第二女高安公主下嫁潁州刺史王勗天授中勗為武后所誅今此志乃云名遂古唐初人多以字為名故名字混殽難考遂古豈非以字行乎

唐淄州開元寺碑

右唐淄州開元寺碑李邕撰并書碑初建於本寺後人移真郡廨敗屋下余為是州遷于便坐用木為欄楯以護之云

唐吏部尚書楊仲昌碑

右唐楊仲昌碑席豫撰鄔繇篆仲昌有兩碑其一韓擇木八分書刻于此碑之陰文皆同仲昌元琰子也唐書元琰列傳與崔沔所撰元琰碑皆云漢太尉震十八代孫此碑乃以仲昌為二十代唐世士人譜牒猶班班可考今元琰仲昌父子碑刻不應差其世次不同如此莫可曉也

唐唐儉碑

右唐唐儉碑去儉字茂約而唐書列傳去字茂系又去男尚識尚豫章公主而唐書於儉傳去名善識於公主傳去名茂識皆其差謬此碑開元中儉曾孫追立距儉之歿雖已遠然至於名字皆不應有誤可以為據也

唐龍門西龕石像銘

右唐龍門西龕石像銘禮部員外郎張九齡撰今世所有曲江集無此文惜其殘缺不完也

唐金仙長公主碑

右唐金仙長公主碑徐嶠之撰明皇御書據唐書本傳

云太極元年與玉真公主皆為道士而碑云丙午歲度  
為道士蓋神龍二年也此於史學不足道然唐史書事  
差謬多如此

唐雲麾將軍李秀碑

右唐李秀碑李邕撰并書碑在幽州按明皇以天寶三  
年改年為載今此碑元年正月立而稱元載何哉

唐高陽觀紀聖德頌

右唐高陽觀紀聖德頌天寶中明皇命方士鍊丹于此  
觀李林甫獻頌稱述功德焉天寶之政荒淫敗度而明  
皇區區方鍊丹以祈長生豈不可笑乎

唐駙馬都尉豆盧建碑

右唐豆盧建碑去建其先慕容氏前燕枝族也九世祖  
萇在魏賜姓豆盧氏封北地王素元和姓纂去慕容運  
孫北地王精入後魏道武賜姓豆盧氏精生醜醜曾孫  
萇生寧而北史寧傳去寧曾祖勝以燕皇始初歸魏授  
長樂郡守賜姓焉唐距北朝未遠氏族書完備士大夫  
人人能知其得姓之自今碑與北史姓纂所載不同如  
此皆莫可考

唐陳隱王祠堂記

右唐陳隱王祠堂記張謂撰按明皇以尹喜舊宅得靈

符遂改元天寶此記云寶符見之二載者天寶二年也  
其末又云龍會甲申海寇吳令光入臣之歲者據紀年  
通譜天寶三載歲次甲申蓋天寶二年斬縣令脩完祠  
堂至明年謂始為記文尔又按唐書帝紀天寶二年十  
二月海賊吳令光寇永嘉郡明年河南尹裴敦復晉陵  
太守劉同昇南海太守劉巨鱗討之閏月令光伏誅今  
此記乃云令光入臣而明皇實錄亦止言敦復等討令  
光平之不言其伏誅不知唐史何所據也豈令光既降  
而殺之歟不然唐史誤矣

唐崔潭龜詩

右唐崔潭龜詩蔡有鄰小字八分書歐陽公稱之以謂與三代彝鼎銘無異而元祐間守京兆者取其石為柱礎世遂不復傳可惜也

唐貞一先生廟碣

右唐貞一先生廟碣貞一先生者司馬承禎也按新舊唐史及諸書皆云承禎字子微今此碑乃云尊師諱子微字承禎初莫能曉後因見崔尚所撰天台桐栢觀碑乃言師名承禎一名子微云

唐陳留尉劉飛造像記

右唐陳留尉劉飛造像記史惟則小字八分書按封演



聞見記云玄宗常幸驪山登朝元閣命群臣賦詩正字  
劉飛詩最清拔特蒙激賞右相李林甫怒飛不先呈己  
出爲一尉而卒士子寃之今此記有云頃校文金殿賡  
歌栢梁叨沐錦衣之賜遂有長沙之役又云聖恩廣被  
移官大梁如此則演所記爲不誣矣林甫妬賢嫉能出  
於天資飛以一詩之善遂遭遠謫其險悞如此記在洛  
陽龍門山字畫甚工而世頗罕傳

唐棣王墓誌

右唐棣王琰墓誌按唐史琰坐馱魅囚於鷹狗坊以憂  
卒而誌云終於咸寧縣興寧里十六王之藩邨史云寶

應元年詔復琰王爵而誌云存王削官蓋琰初未嘗奪  
王爵疑寶應詔書特還其爵尔

唐金城寺放生池碑

右唐金城寺放生池碑書撰人姓名皆已殘缺據田槩  
京兆金石錄以為韓擇木書豈當槩為錄時尚完好可  
讀乎其字畫竒偉非擇木不能為也

唐多寶塔感應碑

右唐多寶塔感應碑岑勛撰顏真卿書多寶塔者僧楚  
金所造楚金嘗寫法華經十餘部寘塔中今猶有存者  
余於士大夫家數見之余亦得其一卷乃乾元二年肅

宗所造卷首佛像繪素畫蹟尚如新也

唐滎陽王妣朱氏墓誌

右唐朱氏墓誌韓擇木書擇木以八分名家石刻存者尚多而此誌獨為正書筆法清勁可愛擇木正書見于世者惟此耳

唐武部尚書楊珣碑

右唐楊珣碑按唐史宰相世系表以珣為友諒子今碑乃云志謙子疑史誤珣楊國忠父也故玄宗親為製碑其末盛稱國忠之美云我有社稷爾能衛之我有廊廟爾能宰之叶和九功九功惟序平章百姓百姓昭明其

語可謂褒矣豈所謂臨亂之主各賢其臣者乎碑天寶  
十二載建蓋後二年祿山起兵又一年國忠被戮矣

唐宇文顥山陰述

右唐宇文顥山陰述杜陵史懷則書懷則與史惟則同  
時必其兄弟也惟則以八分著名懷則之書蓋不減惟  
則而初不見稱於當時者豈非其位不顯乎以此知士  
負其藝能或以垂名于不朽或遂湮沒而無聞者蓋亦  
有幸不幸也若懷則之書非見錄於余則遂泯沒於後  
矣

唐永陽郡太守姚奕碑

右唐姚奕碑奕崇子也新唐史云崇謚文獻而此碑及張說所撰崇碑皆云謚文貞蓋崇父懿已謚文獻父子罕有同謚者當以碑為正

唐雲門山投龍詩

右唐雲門山投龍詩北海太守趙居貞撰序言天寶玄默歲下元日居貞投金龍環壁于此山有瑞雲出于洞中有聲云皇帝壽一萬一千一百歲蓋天寶中玄宗方崇尚道家之說以祈長年故當時諂諛矯妄之徒皆稱述竒恠以阿其所好而居貞遂刻之金石以重欺來世可謂愚矣

唐志歸臺銘

右唐志歸臺銘集古錄云此銘及孔子廟城隍神記三碑並在縉雲其篆刻比陽冰平生所篆最細瘦世言此石皆活歲久稍生刻處幾合故細者恐無是理若果尔更加以歲月則遂無復有字矣此數碑皆陽冰在肅宗朝所書是時年尚少故字畫差踈瘦至大曆以後諸碑皆莫年所篆筆法愈溥勁理應如此也

唐渭南令路公遺愛表

右唐路公遺愛表蘇源明撰新唐史列傳云路嗣恭字懿範今此表乃云公名嗣恭字嗣恭然則唐史以爲字

懿範者不知何所據也

唐呂禋祠廟碑

右唐呂禋祠廟碑衛密撰云上元紀歲之明年詔始置南都以荊州為江陵府命長史曰尹按元結所撰呂公表與肅宗實錄皆云上元元年九月改荊州為南都獨此碑以為二年改恐誤

唐呂公表

右唐呂公表元結撰前太子文學翰林院待詔願誠奢書杜甫集有贈願八分文學詩即誠奢也誠奢八分不多見余所得者衛密撰呂公廟碑并此表郭英奇郭慎

徵碑為四耳甫詩稱其最上小字而此表字畫甚大尤  
壯偉可喜按唐書帝紀及宰相表皆云貞元二年七月  
辛卯謹以母喪罷十月起復上元元年五月壬子復罷  
為太子賓客今此表乃云貞元二年六月丁酉憂上元  
元年七月復罷相月日小不同未知孰是

唐玉真公主墓誌

右唐玉真公主墓誌王縉撰誌云公主法號無上真字  
玄玄天寶中更賜號曰持盈而唐史但言字持盈爾誌  
又云中宗時封昌興縣主睿宗時封昌興公主後改封  
玉真進為長公主唐史但云封崇昌縣主而以昌興為



崇昌者皆其闕誤誌又六元年建辰月卒而史以爲卒於寶應中亦非也此於史學皆至淺末不足道然著之要見唐史多謬誤耳

唐京兆尹鮮于仲通碑

右唐鮮于仲通碑顏真卿撰并書仲通以多財結揚國忠薦爲劔南節度使討南詔蠻大敗國忠爲諱之再薦爲京兆尹其始卒無他可稱見于史者惟嘗表請國忠兼領劔南節制及爲國忠立碑頌功德耳魯公爲此碑稱述甚盛以此知碑志所載是非褒貶果不可信雖魯公猶尔况他人乎明皇實錄稱仲通以漏禁中語貶邵

防司馬而碑言為國忠所忌貶小人之交初以利合終以利敗理固然也

唐慧義寺彌勒像碑

右唐慧義寺彌勒像碑李潮八分書潮書初不見重於當時獨杜甫詩盛稱之以比蔡有鄰韓擇木今石刻在者絕少惟此碑與彭元曜墓誌爾余皆得之其筆法亦不絕工非韓蔡比也

金石錄卷第二十八

跋尾十八唐

唐嚴浚碑

唐郭英乂碑

唐潘孝子頌

唐萬年縣令徐昕碑

唐富平尉顏喬卿碣

唐贈太尉李愬碑

唐麻姑仙壇記

唐涼國夫人李氏碑

唐呂府君敕葬碑

唐高陵令李峴遺愛碑

唐宋璟碑

唐宋廣平碑側記

唐放生池碑陰記

唐滑臺新驛記

唐右僕射裴遵慶碑

唐杜濟墓誌

唐重摸延陵季子墓刻

唐顏勤禮碑

唐顏默殘碑

唐開元寺僧殘碑

唐顏魯公與郭僕射書

唐元結碑

唐張九齡碑

唐右神武將軍史繼先墓誌

唐三藏和尚不空碑

唐內侍監魚朝恩碑

唐康日知墓誌

唐工部尚書辛京杲碑

唐茶山詩并詩述

唐崔宗謝廣利方表

唐嚴浚碑

右唐嚴浚碑徐浩書題禮部尚書襄陽縣開國子席某撰而其名殘缺不可辨按天寶中席豫嘗為此官而碑末有云豫平生交好知其為席豫撰也唐書列傳云浚華州華陰人而碑言馮翊臨晉人碑文字剝落所存無幾惟其首大字十二尚完好筆法奇偉可愛云

唐郭英乂碑

右唐郭英乂碑元載撰按唐書百官志開元中增集賢待制官至永泰時勲臣罷節制無職事皆待制于集賢

門凡十三人今此碑載英父永泰元年寶領此職余觀  
韋述所撰集賢注記開元天寶間凡隸名於集賢者皆  
一時文學之選蓋官以待制為名所以備人主顧問言  
語侍從之臣也今乃以武夫庸人參于其間可乎代宗  
之政其紀綱廢弛者多矣豈特此而已哉

唐潘孝子頌

右唐潘孝子頌崔稱撰孝子字季通與其父良瑗相繼  
有至行親喪皆廬墓大曆中宣慰使李季卿以聞有詔  
褒美墳壠在今中牟縣祥符中章聖皇帝西祀汾陰過  
之詔有司封其墓且禁樵採云

唐萬年縣令徐昕碑

右唐徐昕碑韓雲卿撰碑云昕為并州錄事參軍相國  
姚元之為法曹答部人部人誣上反狀天后臨朝方樹  
刑威詔公先假風憲然後按詰公表直元之則天大怒  
將貶鼎鑊終能犯顏曉辨正刑而出果如雲卿所書昕  
可謂賢矣而唐史不載其事因為錄之昕者有功從弟  
其忠厚之性固宜異於他人也

唐富平尉顏喬卿碣

右唐顏喬卿碣在長安世頗罕傳或云其石今亡矣有  
朝士劉繹如者汶陽人家藏漢唐石刻四百卷以余集



錄闕此碣也輟以見贈宣和癸卯中秋在東萊重易裝  
標因為識之

唐贈太尉李愬碑

右唐李愬碑李紆撰歐陽公集古錄去新唐書列傳載  
愬十餘子江颯涵瀛等同被害惟源彭免據李紆載愬  
子見于碑者十二人未嘗有源也然則源者史家何從  
得之據史言源為司農主簿以碑考之源當為汶余按  
穆宗實錄載源事首尾甚詳云愬被害源方八歲為賊  
所虜流浪南北展轉人家凡七八年洛陽平父之故吏  
以金帛贖之歸于近親代宗聞之授河南府參軍自司

農士簿棄官寓居洛陽惠林佛寺垂五十年長慶中  
御史中丞李德裕表薦拜諫議大夫時年八十餘矣竟  
辭不受又李德裕會昌一品集載薦源表其事皆同然  
則史不為無據蓋疑其初名汶後改為源耳又唐人表  
郊撰甘澤謠載源隱居拜官皆同惟書僧圓澤事頗恠  
誕難信然至其名亦不應謬誤也

### 唐麻姑仙壇記

右唐麻姑仙壇記顏魯公撰并書在撫州又有一本字  
絕小世亦以為魯公書驗其筆法殊不類故正字陳無  
已謂余嘗見黃魯直言乃慶曆中一學佛者所書魯直

猶能道其姓名無已不能記也小字本今錄于後使覽者詳其真偽云

唐涼國夫人李氏碑

右唐涼國夫人李氏碑李郭子儀夫人也碑韓雲卿撰史惟則八分書并篆額文詞頗簡古而字畫工妙可喜或云碑今亡矣故世罕傳雲卿乃退之叔父科斗書後記所謂大曆中以文詞獨行中朝者

唐呂府君敕葬碑

右唐呂府君敕葬碑呂府君者名惠恭僧大濟之父代宗朝元載王縉用事宗尚浮圖之法大濟為僧嘗恪切

德使殿中監故褒贈其父為兗州刺史官為辦葬事  
爵賞之濫一至於此

唐高陵令李峴遺愛頌

右唐李峴遺愛頌峴嘗任高陵縣今後為宰相以歿歿  
後縣令蘇端刻此頌焉碑云曾祖恪封吳王祖琨嗣吳  
王父禕信安郡王元和姓纂所載亦同而唐書列傳以  
為恪之孫誤矣

唐宋璟碑

右唐宋璟碑顏真卿撰并書唐書載廣平六子曰昇尚  
渾恕華衡今此碑言公有七子曰復昇尚渾恕延華衡

乃八子也魯公所撰廣平碑側記亦曰公之第八子衡  
謫官沙州蓋廣平實有八子唐書闕復延二人而此碑  
魯公誤書八字為七尔又碑去廣平自吏部侍郎兼攝  
尚書左丞而史不載後自楚州刺史歷魏兗冀三州兼  
河北按察使遷幽州都督復為魏州而史但言歷兗冀  
魏三州刺史河北按察使進幽州都督而已史又載廣  
平為廣州都督時郡人為璟立遺愛頌璟上䟽辭讓有  
詔許停而碑乃去燕公張說嘗為碑頌今燕公集中實  
有此文豈已為文而未嘗刻石與

唐宋廣平碑側記

右宮宋廣平碑側記顏魯公撰載廣平任御史時持服  
於沙河縣屬突厥寇趙定州河朔兇懼邢州刺史黃文  
軌投艱於公公以父母之邦金革無避及賊至城下公  
為曉陳禍福其徒有素聞公威名者相率而去之開元  
末安西都護趙含章冒于貨賄多以金帛賂朝廷之士  
九品以上悉皆有名後節度范陽事覺有司以聞玄宗  
將加黜責公一無所受乃進諫焉玄宗納之遂御花萼  
樓一切釋放舉朝皆謝公衣冠儼然獨立不拜翌日玄  
宗謂公曰古人以清白遺子孫今卿一人而已公曰含  
章之賄偶不及臣門非不受也玄宗深嘉之又去公第

八子衡因謫居沙州參佐戎幕土番入寇陷于賊庭素  
聞太尉名德曰唐天子我之舅衡之父舊賢相也其可  
留乎大曆十一年以三百騎盡室護歸此皆廣平逸事  
有以見其清德冠當世威名動夷狄如此而新舊史皆  
不載故併錄之于此俾覽者得詳焉

### 唐放生池碑陰記

右唐放生池碑陰記唐肅天寶以後紀綱廢壞職官之  
濫不可勝載此記具列當時僚屬名氏凡團練副使別  
駕四人同團練副使一人長史三人司馬三人錄事參  
軍三人司功司倉司兵皆一人司法司皆一人司田

司士皆二人叅軍四人烏程縣令一人丞三人主簿一人尉四人長城縣令一人丞三人主簿一人尉五人安  
言縣令一人攝令一人丞二人主簿一人尉六人武康  
縣令二人丞三人主簿二人尉四人德清縣令一人丞  
二人主簿一人尉三人一郡而吏負猥多如此然吏不  
能盡記故詳錄之于此焉

唐滑臺新驛記

右唐滑臺新驛記李勉撰李陽冰篆其陰有銘歐陽公  
云不知作者為誰余嘗攷之乃舒元興王筋篆志後贊  
也其文載于唐文粹及元興集中歐陽公偶未嘗見之



尔

唐右僕射裴遵慶碑

右唐裴遵慶碑唐書列傳載遵慶所歷官甚簡略以碑考之其尤著者自吏部郎出為濛陽太守貶符陽郡徵拜禮部郎中而史不載肅宗朝拜給事中累遷尚書右丞兵部戶部侍郎再授吏部而史但言為吏部侍郎而已又史云遵慶薨時年九十餘碑云年八十五碑云遵慶謚貞孝而史無之皆其闕誤也

唐杜濟墓誌

右唐杜濟墓誌但云顏真卿撰而不云書歐陽文忠公

以謂非魯公不能爲也蓋世頗以爲非顏氏書更俟識者辨之余觀此誌字畫奇偉決非他人可到歐陽公信小字麻姑仙壇記以爲真蹟而尚疑此誌何哉

唐重模延陵季子墓刻

右吳季子墓刻自唐以來相傳爲孔子書大曆中蕭定再摸而刻之余覽史記家語及秦漢以前諸子凡孔子與學者談議問答是非褒貶纖悉必載其間荒誕之說實非出于聖人附託書之者固有之矣况於季子之賢孔子親銘其墓不應略不見稱于前世至唐而始傳也又碑銘始於東漢孔子時所未有而其字畫乃故爲奇

惟以欺眩世俗者非孔子書無疑蓋好事者僞爲尔故  
余特爲錄之以解來者之惑後有博識之士當以余言  
爲然

唐顏勤禮碑

右唐顏勤禮碑魯公撰并書元祐間有守長安者後圃  
建亭榭多輦取境內古石刻以爲基址此碑幾毀而存  
然已磨去其銘文可惜也

唐顏默殘碑

右唐顏默殘碑者初穎川人家以其石爲馬臺皇祐中  
王回深父之弟固容季見而識其爲魯公書因摸卒以

傳深父爲文以記之默仕嘗爲汝陰太守故大曆中魯公追建此碑于汝陰焉

唐開元寺僧殘碑

右唐開元寺僧殘碑雖書撰人姓名殘缺然以字畫驗之爲顏魯公書無疑也初仁宗朝吳長文叅政在京師僦居治地得之當時文士皆爲賦詩今其石尚藏汶上長文家云

唐顏魯公與郭僕射書

右唐顏魯公與郭僕射書僕射郭英乂也魯公於座位高下小有失當猶力爭如此使之立朝其肯逢君之惡

乎

唐元結碑

右唐元結碑顏魯公撰并書按唐書列傳結後魏常山  
王遵十五世孫而碑與元氏家錄序皆云十二世蓋史  
之誤文碑與元和姓纂皆云結高祖名善禕而家錄作善  
禕未知孰是也

唐張九齡碑

右唐張九齡碑徐浩撰并書歐陽公集古錄云按唐書  
列傳所載大節多同而時時小異碑長慶中立而公薨  
在開元二十八年至長慶三年實八十四年所傳或有

同異至於年壽官爵子孫宜不謬當以碑爲是今考之  
浩撰碑時爲嶺南節度使在大曆間距曲江之卒未遠  
至長慶中其家始刻石尔劉禹錫讀曲江集詩序以謂  
曲江燕翼無似終爲餒鬼而碑載公嗣子拯孫燕器碑  
後又載曾孫敷慶玄孫景新景重然則曲江爲有後矣  
不知禹錫何所據乎碑又云公一名博物而史不載

唐右神武將軍史繼先墓誌

右唐史繼先墓誌徐浩撰云公諱繼先字繼先夏后氏  
之苗裔殷時遷于此土曾祖牟兩汗祖墨啜可諱瓌父墨特勒  
諱逾輪肇歸皇化封右賢王又云繼先玄宗時爲左金

吾衛大將軍酒泉郡太守河西節度副使肅宗初知神  
武軍事賜姓史氏其後為右神武將軍封潁國公卒于  
建中元年按唐書突厥傳載墨啜子孫事甚略粗可見  
者云命默啜子左賢王墨特勒討毗伽可汗其歸朝及  
繼先賜姓等事史皆無之又史云默啜而墓誌作墨史  
云墨特勒為左賢王而墓誌作右賢王皆當以墓誌為  
據元和姓纂紀史氏亦不載繼先名姓故詳錄之以裨  
唐史及姓纂之闕漏云

唐三藏和尚不空碑

石唐不空碑唐自明皇以後職官不勝其盛下至佛老

子之徒亦皆享高爵重祿故不空始為特進大鴻臚封  
肅國公既歿又贈司空嗚呼名器之輕一至於此昔舜  
命伯禹作司空與是異矣

唐內侍監魚朝恩碑

右唐魚朝恩碑吳通玄撰通微書朝恩雖以譴死然其  
徒如竇文場焦奉超猶居中用事故德宗朝詔為立碑  
通玄兄弟於陸贄謗毀抵排無所不至至為朝恩碑則稱  
頌功德如此可以見其為人矣

唐康日知墓誌

右唐康日知墓誌李紆撰唐書日知傳去祖植開元中



為左武威大將軍而誌云祖諱石生傳云日知終晉絳  
節度使而誌云卒於左威衛上將軍傳云累加檢校尚  
書左僕射贈太子太師而誌云為檢校兵部尚書其卒  
乃贈僕射紆與日知同時人墓誌所書宜得其實也

唐工部尚書辛京杲碑

右唐辛京杲碑按元和姓纂載辛氏云懷節生言為都  
水使者言生雲京京杲而碑乃云懷節生思廉為左驍  
衛大將軍公即大將軍之愛子金城郡王之從父弟新  
史所書亦同金城郡王即雲京也然則姓纂以京杲為  
言之子雲京之同父弟誤矣

唐茶山詩并詩述

右唐袁高茶山詩并于頤撰詩述李吉甫撰碑陰記共  
兩卷湖州歲貢茶高為刺史作此詩以諷高怒已孫也  
貞元中德宗將起盧杞為饒州刺史高任給事中爭甚  
力於是止用杞為上佐德宗猜忌刻薄出于天資信任  
盧杞幾亡天下奉天之圍賴陸贄之謀以濟杞之貶黜  
迫于公議然終身眷眷不能忘於贄則一斥不復其奔  
走播遷而不亡者豈非幸歟非高等力排其姦則復任  
用杞未可知也唐史稱高代宗時累遷給事中建中中  
拜京畿觀察使坐累貶韶州長史復拜給事中吉甫為

碑陰述高所歷官甚詳云大曆中從其父贊皇公辟爲  
丹陽令再表爲監察御史浙西團練判官德宗嗣位累  
遷尚書金部員外郎右司郎中擢御史中丞爲杞所忌  
貶韶州長史尋刺湖州收復之歲徵拜給事中以卒然  
則高代宗朝未嘗爲給事中德宗朝未嘗拜京畿觀察  
使其貶韶州時實爲中丞而其爲中丞與湖州傳者不  
載今并著之以證唐史之誤

唐崔綜謝廣利方表

右唐崔綜謝廣利方表德宗貞元中自著方書號貞元  
廣利方頒之郡國綜時爲同州上表稱射德宗信任姦

臣毒流天下而區區欲以醫方救民疾苦可謂婦人之仁矣

金石錄卷第二十八

金石錄卷第二十九

跋尾十九唐

唐義興縣重脩茶舍記

唐昭義軍節度王虔休碑

唐顏杲卿碑

唐乘廣禪師碑

唐般舟和尚碑

唐韓退之題名

唐國子助教薛公達墓誌

唐虞城令李公去思頌

唐贈吏部尚書武就碑

唐彌陀和尚碑

唐魏博田緒遺愛碑

唐右僕射裴耀卿碑

唐劉統軍碑

唐興元節度裴玢碑

唐贈司空于夔碑

唐左常侍薛苹碑

唐呂元膺碑

唐檢校太子少保田公碑

唐昭義軍節度辛秘碑

唐黃陵廟碑

唐贈太保李良臣碑

唐絳守居園池記

唐柳州井銘

唐澠州刺史高公德政碑

唐西平王李晟碑

唐烏重循碑

唐李祐墓誌

唐令狐公先廟碑

唐殿中侍御史韋胡墓誌

唐義興縣重修茶舍記

右唐義興縣新脩茶舍記云義興貢茶非舊也前此故御史大夫李栖筠實興是邦山僧有獻佳茗者會客嘗之野人陸羽以爲芬香甘辣冠於他境可薦於上栖筠從之始進萬兩此其濫觴也厥後因之徵獻浸廣遂爲任土之貢與常賦之邦侔矣每歲選匠徵夫至二千餘人云余嘗謂後世士大夫區區以口腹玩好之獻爲愛君此與官官宮妾之見無異而其貽患百姓有不可勝言者如貢茶至末事也而調發之擾猶如此况其甚者乎羽蓋不足道嗚呼孰謂栖筠之賢而爲此乎書之可



為後來之戒且以見唐世義興貢茶自羽與柄鈞始也

唐昭義軍節度王虔休碑

右唐昭義軍節度王公碑其名已殘缺以事考之蓋王  
虔休也與唐書列傳所載官爵行治多同惟碑云贈右  
僕射轉為左僕射小失不足道而碑與傳皆云虔休汝  
州梁縣人元和姓纂以為范陽人非也

唐顏杲卿碑

右唐顏杲卿碑真卿撰元和中舊石刊缺其甥盧佐元  
重書而刻之舊唐史言杲卿既殺蔣欽湊等玄宗知之  
加杲卿衛尉卿兼御史大夫以表褒謙為常山太守杲

卿爲司馬今以碑考之乃進無中丞追赴京而人賈深爲  
司馬新史所書亦同蓋舊史之謬碑又言公初被遷首  
於右金吾街樹有張湊者收其髮謁玄宗俄見夢云禦  
捍處多兵馬少玄宗哭而設祭焉後湊以髮至夫人疑  
之駭牀而哭忽聞聲如鞭牀者髮箱跳而前夫人方駭  
信之其事甚恠而舊史不書新史所載亦簡略杲卿忠  
義之節貫金石其死宜不昧而魯公之語可信不疑故  
畫錄其事于此

唐乘廣禪師碑

右唐乘廣禪師碑劉禹錫撰初余爲金石錄頗以唐賢

所為碑板正文集之誤禹錫之文所錄才數篇最後得此碑以校集本是正者九數十字以此知典籍歲久轉為脫誤可勝數哉

唐般舟和尚碑

右唐般舟和尚碑柳宗元撰并書子厚頗自矜其書然亦不甚工今見于世者惟此與彌陀和尚碑爾雖字畫小大不同然筆法絕相似歐陽公以為不類又疑他人借子厚之名者非也

唐韓退之題名

右唐韓退之題名在嵩山天封觀柱蓋及石書又一

本與石洪等題名在洛陽福先寺乃同游者所書尔世間又有退之與大顛書乃國初一學佛者僞作而歐陽公集古錄以為非僞水叔平生為文宗師退之且力詆釋氏而獨信此書何邪

唐國子助教薛公達墓誌

右唐薛公達墓誌韓退之撰以昌黎集本校之頗不同皆當以石本為是今略舉數處集本云曾祖曰希莊父曰播而闕其祖石本乃云祖曰元揮果州流溪縣丞贈左散騎常侍集本云君執弓曹二矢挾一矢以興而石本作指一矢以興集本云遺言曰以公儀之子為已後

而石本作以公儀之子已已後我蓋其小字也如此類  
甚衆略舉數處要知石刻可貴尔

唐虞城令李公去思頌

右唐虞城令李公去思頌李白撰王適書碑側題云元  
和四年二月重篆蓋適不與白同時此碑後來追建尔  
歐陽公集古錄云適在陽冰前者誤也

唐贈吏部尚書武就碑

右唐武就碑就元衡父也元和姓纂載平一四子集備  
就登備生元衡今此碑與唐書宰相世系表皆以元衡  
爲就子姓纂元和中脩是時元衡爲宰相不應差其世

次豈余家所藏本偶尔脫誤乎當俟別本校工

唐彌陀和尚碑

右唐彌陀和尚碑柳宗元撰并書以集本校之不同者十餘字皆當以碑為正

唐魏博田緒遺愛碑

右唐魏博田緒遺愛碑裴洎撰張弘靖書政和中與柳公權所書何進滔德政碑俱為大名尹所毀

唐右僕射裴耀卿碑

右唐裴耀卿碑許孟容撰宋次道春明退朝錄載皇祐中王沂公曾之弟子融侍郎守河中還以唐明皇所題

裴耀卿碑額上之仁宗遂御篆賜沂公碑額曰旌賢  
此碑元和中立文與額皆歸登書非明皇所題疑子融  
所上乃明皇書裴光庭碑耳耀卿光庭二碑皆在絳州  
也又按新唐史列傳云耀卿字煥之宰相世系表作煥  
之而碑乃字子渙傳云耀卿守真次子而碑乃第三子  
皆史家之謬

### 唐劉統軍碑

右唐劉統軍碑字畫雖殘缺猶歷歷可辨以昌黎集本  
校之時有異同皆當以碑為是惟叙其世系不同則疑  
碑之誤集本云公曾祖考為朔州守祖令太原再世北

邊樂其高寒弃楚不還逮于公身二世晉人而墓誌亦云曾大父諱承慶朔州刺史大父巨敷為太原晉陽令遂著籍太原之陽曲今此碑乃云考令太原又云再世晉人且碑既言陽曲之別繇公祖遷則其為晉人非再世明矣余故曰石本誤也碑當時所立其諸子皆在不應差其世次而錯謬如此莫可曉也

唐興元節度裴玠碑

右唐裴玠碑晉公裴度撰碑已斷裂其姓氏摩滅不可識云公諱玠字連城以事考之蓋裴玠也玠元和中為興元節度使以疾歸朝卒新舊史皆有傳舊史云五代祖



踈勒國王緯武德中來朝授鷹揚大將軍天山郡公因  
留為京兆人而新史乃云名糾今碑所載與舊史同不  
知新史何所據而改為糾乎疑轉寫誤爾又新舊史皆  
云緯玠五世祖而碑云高祖亦當以碑為正

唐贈司空于夔碑

右唐于夔碑集古錄載夔碑云盧景亮撰今此碑乃張  
躬撰疑夔有兩碑景亮所撰余錄中偶無之當俟訪求

唐左常侍薛莘碑

右唐薛莘碑唐史列傳云莘父順為奉先尉而此碑及  
元和姓纂皆云名順先蓋史誤

唐呂元膺碑

右唐呂元膺碑舊唐史云元膺字景文新史云字景夫而碑乃字孟淳新舊史皆云元膺自御史中丞拜岳鄂觀察使而碑乃為岳鄂觀察兼中丞尔其卒也舊史云謚曰憲而碑作獻皆當以碑為據

唐檢校太子少保田公碑

右唐檢校太子少保田公碑李宗閔撰文字殘缺以事考之蓋田弘正之兄融碑也弘正帥魏博詔以融為相州刺史使之相近唐史稱弘正幼孤事融甚謹軍中嘗分曹習射弘正聯中融怒退扶之故當田季安猜暴時

能自全及為軍中推迫融不悅曰爾竟不自悔取禍之道也其後弘正與其子布皆被禍如融言融兄弟父子出於軍旅其智略皆過人如弘正布之忠義融之先見真一代豪傑也碑為篆字題嵩山布衣書而名姓摩滅不可識其筆蹟頗佳

### 唐昭義軍節度辛祕碑

右唐辛祕碑與新唐史所載事跡大略皆同惟碑與舊史皆云登五經開元禮科而新史六舉明經碑云其卒贈右僕射而新舊史皆作左僕射爾又舊史云謚曰昭而新史云謚曰簡後更謚懿諱不載其謚莫知孰是也

唐黃陵廟碑

右唐黃陵廟碑碑四面皆有字今其兩面字多處已磨滅不可讀此本蓋七八十年前舊物字畫完好可寶也今世所傳退之集多爲人妄加訓校而此碑人家尚時有之故訛謬爲少然退之自潮移表入爲國子祭酒實三年而碑云三十年蓋書碑者誤爾

唐贈太保李良臣碑

右唐李良臣碑良臣李光顏之父也碑李宗閔撰文詞爾雅可喜宗閔牛僧孺皆一代奇才而自陷朋黨惜哉

唐絳守居園池記

右唐絳守居園池記樊宗師撰昔之爲文者雖務爲新語然未嘗有意于求竒也宗師之文乃故爲險恠必使人不可曉而後已此豈作者之體哉

唐柳州井銘

右唐柳州井銘柳宗元撰沈傳師書字畫頗不工疑後人僞爲然以子厚集本校之不同者數字此本爲善又恐工人摸刻不甚精好尔更俟識者辨之

唐澠州刺史高公德政碑

右唐澠州刺史高公德政碑王起撰按唐書地理志元和十二年以鄆城上蔡西平遂平四縣置澠州長慶元

年州廢今碑後題長慶而其下殘缺當爲元年蓋是年  
州遂廢矣高公者名承簡崇文之子爲裴度牙將後至  
邠寧節度唐史有傳

唐西平王李晟碑

右唐李晟碑裴度撰碑載西平子十二人愿聰摠孫憑  
恕憲翹懿聽慧愨唐史宰相世系表所書亦同而新舊  
史列傳皆云晟有十五子舊史云侗袖偕無祿早世豈  
以侗等早世故碑不載歟又李石撰李聽碑云西平有  
子十六人疑更有未名而卒者尔元和姓纂載西平子  
十人以碑校之姓纂闕聰摠憑懿四人而孫應二子墓

碑舊史皆無之又其倫次差謬亦當以碑為正

唐烏重胤碑

右唐烏重胤碑新唐史列傳六重胤為橫海節度使討  
王廷湊久不進兵穆宗以為觀望詔杜叔良代之以重  
胤為太子太保長慶末以檢校司徒同中書門下平章  
事為山南西道節度使召至京師改節天平軍文宗初  
真拜司徒今以碑考之重胤為橫海節度也長慶元年  
徙為山南西道周歲徵入改天平軍四年就拜太子太  
保文宗踐極真拜門下平章事項之同中書為司徒餘  
如故蓋重胤之罷橫海即移鎮興元未嘗拜太子太保而

其為太保實帥天平又其帥興元時未嘗兼宰相至文  
宗即位乃拜爾舊史與文宗實錄所書略同皆可以正  
新史之失

唐李祐墓誌

右唐李祐墓誌庾敬休撰新唐書祐列傳云祐為夏綏  
銀節度使徙涇原討李同捷也改滄德景節度累檢校  
尚書左僕射董重質之貶未幾轉太子少詹事隸武寧  
軍遷左神武將軍擢累左右神策行營劔南西川節度  
復云歷帥夏綏銀終右龍武統軍贈尚書右僕射其所  
書首尾顛倒今以墓誌考之祐以平蔡功超授左神武



將軍從徐州李愬平李師道遷左金吾衛將軍帥綏銀  
夏遷戶部尚書兼左金吾衛大將軍遂為齊德滄景等  
州鄆度使以卒其所歷官止此矣蓋未嘗為少詹事帥  
涇原領劔南節制也不知史何所依據又誌云卒於滄  
景而傳言終龍武統軍誌云贈司徒而傳言贈僕射亦  
當以誌為是祐之為吳元濟將也據李愬傳言吳秀琳  
之降為愬策曰必破賊非李祐不可祐賊健將也守興  
橋柵其戰常易官軍愬候祐獲于野遣史用誠以壯騎  
三百伏其旁祐果輕出遂為所禽今誌乃言祐潛布款  
誠於愬且曰某以某日歸命其就執也願得傷工又以

爲解不然妻子之在賊城無遺類矣愬許之洎至唐州同執者十二人命斬於牙門外次至祐大叫謂愬曰公昔初約邪今淮蔡未平不宜誅壯士愬乃釋之自取藥封其臂分衣服飲食與語終日即署爲都知兵馬使二說不同未知孰是也

唐令狐公先廟碑

右唐令狐公先廟碑劉禹錫撰集本云躬若奉盈而碑本躬作躬案史記周公世家云躬躬然如畏徐廣曰躬躬謹敬兒也出三蒼後人不知躬字所出遂改爲躬誤矣其他異同尚多不盡錄也

唐殿中侍御史韋翊墓誌

右唐韋翊墓誌劉禹錫撰世所傳禹錫文集無此誌蓋禹錫集本四十卷今亡其十卷墓誌皆闕非獨此一篇也翊有子詢仕爲湖南觀察使舊史有傳新史無之墓誌云翊父幼卿而傳作召卿墓誌云翊官終殿中侍御史而傳作侍御史皆非也

...

...

...

...

...

...

...

...

...

...

金石錄卷第三十

跋尾二十唐

五代

唐義陽郡王符璘碑

唐贈太尉王智興碑

唐丞相崔群碑

唐何進滔德政碑

唐李聽碑

唐贈太師崔倬碑

唐相國李涼公碑

唐牛僧孺碑

唐太子太傅劉沔碑

唐醉吟先生傳并墓碑

唐贈太尉李固言碑

唐吏部尚書高元裕碑

唐贈司徒薛平碑

唐起居郎劉君碑

唐贈禮部尚書許康佐碑

唐潛溪記

唐贈司空孔岑父碑

千字文

陸鶴銘

冬日陪群公泛舟詩

唐題阮客舊居詩

唐遺教經

唐冰清琴銘

唐中書舍人王無競碑

後唐汾陽王真堂記

漢重脩高祖廟碑

南唐紫極宮石磬銘

周文宣王廟記

日本國誥

唐義陽郡王苻璘碑

右唐苻璘碑按唐書列傳璘姓苻而碑作苻以姓氏書考之琅邪苻氏出於魯頃公之孫公雅為秦苻節令因以為氏而武都苻氏出於有扈之後為啓所滅奔西戎代為氏酋本姓蒲至苻堅以背有文改焉今此碑以璘為苻氏又云其先琅邪人皆不可知然按璘與弟瑤皆封邑于琅邪豈書碑者誤以苻為苻其家出于武吏不知是正乎

唐贈太尉王智興碑

右唐王智興碑裴晉公撰智興出于卒伍無他才能其



為將帥雖有破李師道李峇李同捷之功然在徐州跋扈難制逐崔群侯弘度剽奪貢物重歛以結權倖其功不足掩過晉公為此碑可謂過其實矣

唐丞相崔群碑

右唐崔群碑裴晉公撰劉禹錫書字畫訛缺處多其可考者群為武寧軍節度使檢校禮部尚書而唐史本傳作兵部其自荆南節度使召拜檢校左僕射太常卿遂為吏部尚書以卒而傳但云召拜吏部尚書而已皆當以碑為正群在憲宗朝號稱賢相是時皇甫鏞方有寵群力排其姦且為憲宗陳開元天寶治亂所以分者其

語激切然憲宗竟逐群而相鑄夫以群之賢憲宗之明  
然讒間一入且猶不免自古君臣之際能保終始者顧  
不難哉

唐何進滔德政碑

右唐何進滔德政碑進滔事迹固無足取而柳公權書  
法為世楷模此碑尤為雄偉政和中大名尹建言磨去  
舊文別刊新製好古者為之歎惜也

唐李聽碑

右唐李聽碑與唐史所載事迹多同惟聽罷魏博節度  
使碑言為太子太師而史作少師小誤爾

唐贈太師崔陲碑

石唐崔陲碑據新唐史僦于邠傳云僦位吏部侍郎今以碑考之陲仕至檢校吏部郎中兼御史中丞爾蓋傳誤也

唐相國李涼公碑

右唐李涼公碑李德裕撰文字殘缺不可盡識按新唐史列傳載石所歷官甚略其最著者嘗兼御史中丞充巡邊使天自給事中遷京兆尹史皆不載其爲荆南節度也史云讓中書侍郎換檢校兵部尚書會昌三年檢校司空徙節河東而碑云初加檢校尚書武宗承統首

讓中書侍郎就遷檢校右僕射餘如故皆當以碑為正

唐牛僧孺碑

右唐牛僧孺碑李珣撰據碑云僧孺自襄陽節度使降授太子少師遷檢校司徒兼太子太保而傳言下遷太子少保進少師碑云宣宗即位自汝州長史遷太子少保轉少師分司東洛而史但言還為少師亦不言其為分司者皆史之闕誤又杜牧撰僧孺墓誌云文宗朝以中書侍郎領平章事而史作門下侍郎亦非也

唐太子太傅劉沔碑

右唐劉沔碑按舊史云沔許州牙將也少事李光顏為

帳中親將元和中討吳元濟有功隨光顏入朝憲宗留  
宿衛歷三將軍鹽州刺史天德軍防禦使移振武節度  
使而碑乃去河北遊至單于都護府謁節度使范希朝  
希朝署牙門將入右神策軍為大將累遷大將軍拜涇  
原節度使移振武蓋沔初未嘗為許州牙將從李光顏  
平蔡及為鹽州刺史天德軍防禦使皆當以碑為正至  
新史所書悉與碑合疑史官嘗得此碑以訂舊史之失  
云

唐醉吟先生傳并墓碑

右唐醉吟先生傳并墓碑舊唐史云居易以大中元年

卒年七十五而新史云卒於會昌六年年六十五今碑所書與新史合又舊史書居易拜官歲月亦多差謬不合小失不足道故不錄

唐贈太尉李固言碑

右唐李固言碑按新唐史列傳云固言自河中節度使以疾爲太子少師遷東都留守宣宗即位遷右僕射後以太子太傅分司東都卒以碑考之其初爲東都留守數月罷以本官分司而史不書宣宗時爲僕射再遷檢校司徒東都留守而史亦不書其卒也史云年七十八而碑云年七十六亦當以碑爲據

唐吏部尚書高元裕碑

右唐高元裕碑據舊史元裕列傳及此碑皆云元裕祖名魁而新史宰相世系表獨作彪蓋誤

唐司徒薛平碑

右唐薛平碑據唐史列傳平為平盧軍節度使就遷檢校右僕射封魏國公寶曆初入朝拜檢校司空為河中節度使進檢校司徒更封韓以碑考之自平盧拜僕射進封韓國公敬宗即位拜檢校司空寶曆元年朝京師換左僕射兼戶部尚書踰月復為檢校司空節度河中

文宗即位就加檢校司徒蓋未嘗封于魏而敬宗時入

朝所拜官吏亦不載皆其闕誤也碑言平罷滑臺為金  
吾嘗見二神人自天執節降庭中呼曰薛平還汝舊節  
公俯伏拜受及再為滑臺以為當之矣後為平盧乃驗  
焉其事甚恠而唐史無之豈非妄歟

唐起居郎劉君碑

右唐起居郎劉君碑劉氏世墓在彭城叢亭里紹聖間  
故陳無已學士居彭城以書抵余曰近得柳公權所書  
劉君碑文字摩滅獨公權姓名三字煥然余因求得之  
碑殘缺然可識者猶十三四不忍弃故錄之

唐禮部尚書許康佐碑



右唐許康佐碑康佐事文宗為翰林侍講學士文宗嘗  
讀春秋問康佐闔寺事康佐顧望不敢對後以問李訓  
訓遂進翦除之計康佐知帝指因稱疾罷為兵部侍郎  
甘露之禍李訓實啓之其狂率固有罪然康佐以儒學  
侍講備顧問而喑默不對至辭位而去亦可謂全軀保  
妻子之臣矣

唐潛溪記

右唐潛溪記杜宣猷撰潛溪者在洛陽龍門山側地有  
谿谷之勝舊為宰相李藩別墅宣猷購得之加葺治焉  
唐史官者傳載宣猷為福建觀察使中官多閩人宣猷

每歲時遣吏爲上冢當時號爲救使墓戶用此除宣城  
夫疏泉石種樹莧草竄登覽游觀之勝此山林獨徃之  
士遺世棄俗者之所樂也如宣猷者區區以諂諛附會  
盜竊顯榮而欲擅山林獨徃之樂是可笑也

唐贈司空孔岑父碑

右唐孔岑父碑鄭綱撰歐陽公集古錄云碑有子五人  
載幾戡戡按新唐書宰相世系表岑父六子戡之下  
又有威表據孔氏家譜譜其家所載碑文鄭綱撰綱自  
言與孔氏有世舊作碑時幾等尚在然則譜與碑文皆  
不應有失而不同者何也余按韓行退之爲幾墓誌云公

之昆弟五人載戡戡戮公於次爲第二與網所撰碑正  
合然則安得復有威平蓋網與退之皆當時人所書宜  
不謬而家譜乃其後裔追書容有差誤不足恠也

### 千字文

右千字文世傳智永書非也蓋智永陳時人而此書唐  
字民字基字皆闕之以避唐諱乃明皇已後人所書不  
然筆法本出智永後來臨摹入石其間二十八行字  
畫不類蓋舊本不完國初時人爲補足之云

### 瘞鶴銘

右瘞鶴銘題華陽真逸撰莫詳其爲何代人歐陽公集

古錄云華陽真逸是顧况道號余遍檢唐史及况文集皆無此號惟况撰湖州刺史廳記自稱華陽山人尔不知歐陽公何所據也

冬日陪群公泛舟詩

右冬日與群公泛舟詩在潤州瘞鶴銘傍其字畫正同蓋一人所書也題謫丹陽工曹掾而不見其名詩與書皆工然世頗罕傳

唐題阮客舊居詩

右題阮客舊居詩小篆書集古錄以爲陽冰作今驗其姓名乃縉雲令李萼非陽冰也其字畫亦不工蓋陽冰

肅宗上元中嘗令縉雲其篆字石刻尚多有存者故歐陽公亦誤以此詩爲陽冰作尔

唐遺教經

右唐遺教經國初時人盛傳爲王右軍書惟歐陽公識其非是余家藏金石刻二千卷獨此經最爲舊物蓋先公爲進士時所畜爾

唐冰清琴銘

右冰清琴銘詞翰皆不俗可喜題曰晉陵子而不著名氏豈非隱者歟琴藏太常寺協律郎陳沂家沂死納于壙中云

唐中書舍人王無競碑

右唐王無競碑無競事迹附見唐書陳子昂傳後以碑  
考傳頗不合傳言自殿中侍御史徙太子舍人神龍初  
出爲蘇州司馬貶廣州仇家矯制榜殺之而碑言爲中  
書舍人卒傳言坐與張易之等交徃貶而碑云兩張弄  
權九有蕩析公黜而無愠皆莫知其孰是據碑言無競  
無子孫權知萊州刺史姚訥爲買石立碑去無競之歿  
已遠事得于傳聞未足盡信也無競東萊人墓在掖縣  
界中云

後唐汾陽王真堂記

右後唐汾陽王真堂記李鷄書鷄為時仕為國子丞九經  
印板多其所書前輩頗貴重之余後得此記其筆法蓋  
出歐陽率更然窘於法度而韻不能高非名書也

漢重脩高祖廟碑

右漢重脩高祖廟碑郭忠恕八分書余年十七八時已  
喜收畜前代石刻故正字陳無已徐人為余言豐縣有  
此碑託人訪求後數年乃得之然字畫頗軟弱余家有  
忠恕八分懷嵩樓記墨跡乃其暮年所書筆力老勁非  
此碑之比亦嘗刻石今錄于次

南唐紫極宮石磬銘

右南唐紫極宮石磬銘徐錯撰并小篆書錯與其兄鉉  
在江南以文翰著名王師南征錯卒于圍城中鉉隨後  
主歸朝貴顯以壽終歐陽公集古錄云宋興違命侯來  
朝二徐皆得為王臣者誤矣

### 周文宣王廟記

右周文宣王廟記題縣令郭忠恕撰并書按國史忠恕  
為漢湘陰公從事周祖徵為周易博士國初貶虢州司  
戶太宗朝復任國子主簿流登州卒不載其嘗為縣令  
也記云縣在汝水之泃高山之陽不知其為何縣最後  
題甲寅四月十五日建蓋周世宗乾德元年也或云此



記在汝州界中

日本國誌

右日本國誌題康保五年日本在海東自漢以來見于史然與中國不常通宋莒公紀年通譜載其國年號九而獨無康保其後畢仲荀見此誌錄于通譜之末然不知康保是中國何年也余家集錄金石刻凡二千卷外國文字著錄獨此而已



趙明誠金石錄三十卷宋槧之亡世傳鈔本以萊竹堂葉氏鈔本為最善錢聲室自言借文休承宗雕本鈔完識於第十卷後獨吳文定本人未之見莫知其所從出後人重刻清初有謝世箕本譌舛甚多殊不足觀繆小山得汲古毛氏本行款均據宋<sup>刻</sup>為仁和朱氏刊行余家藏有呂无黨鈔本曾印入四部叢刊余嘗借瞿氏所藏顧澗濱校本對校之二本大抵不離乎葉錢西傳錄者近是盧雅雨本最為通行然亦僅據何義門校鈔本本並未親見宋刊讀書敏求記稱馮覲祥有不全宋槧十卷余頗疑即文休承所曾藏者馮書散出迭經名家鑒藏先後入於朱文石鮑以文江玉屏趙晉齋阮文達韓小亭家卒以歸於潘文勤其十卷即

原書跋尾一至十實即全書之卷第十一至二十也當世  
證為奇書得之者咸鑄一金石錄十卷人家小印以自  
矜異一時名下如翁覃溪姚伯昂汪孟慈洪均軒沈  
乾盧諸人均有題記滂喜齋藏書記備載無遺各  
以盧本互校是正良多雖宋本亦有訛誤然迴非其他  
諸本所能幾及文勤自言異書到處真如景星慶雲  
先覩為快獲觀之人亦以為此十卷者殆為人間孤本矣  
而孰知三十卷本尚存天壤忽於千百年沈羶之下燦然  
呈現夫豈非希世之珍乎是本舊藏金陵甘氏津逮樓  
世無知者目錄十卷跋尾二十卷完好無缺宋時刊本  
凡二種鈔本於龍舒郡齋開禧改元趙不諱重刻於  
浚儀且惜易安之跋未附因以為殿劉跋之序成於政和

七年必早經剝削在前今皆不若想已道味然窺見  
全豹祇欠一鉅固無傷也茲可異者潘本諸人題記所  
引文宗本文字余取以對勘是本多有不符如卷第  
十四漢陽朔博字跋洪校引尉府靈壁陽朔四年  
始造設已所有十四字甘本四年字下始造字上多正  
朔二字又巴官鐵量銘跋翁校題下韓暉仲此作韓  
注仲甘本却作韓暉仲不作韓注仲又漢從事武  
梁碑跋洪校引故從事武掾掾字綏宗掾體德忠孝  
十四字謂隸釋本上掾字不重綏宗下無掾字此本與  
碑合甘本上掾字却重掾字下更有諱梁二字綏宗下  
亦有掾字卷第十五漢州輔墓石獸膊字跋姚校謂天  
祿近歲為村民所毀天作夫甘本却作天不作夫卷第

十六漢車騎將軍馮緄碑跋翁校謂謄此作誣甘平  
却作謄不作誣大漢帝堯碑跋沈校引龍龜負銜校  
鈔六字謂盧本作校鈔案隸釋碑文正作鈔甘平因  
作鈔但作校鈔不作校鈔卷第十八漢司空宗俱碑跋  
汪校引官秩姓名四字謂官誤作主甘平因作官但  
官秩字下名字上却無姓字姚伯昂又言本中傳字  
俱作傳亦係刊刻之未精案甘平卷第十六漢淳于  
長夏承碑跋太傅胡公歆其德美又漢廷尉仲定碑  
跋太傅下邳趙公舉君高行下文傳字又一見卷第十  
九漢廷府君墓石注篆文跋漢故博士趙博廷府君  
神道下文傳字又四見此八傳字右旁俱作專但上半甫  
字有點者二無點者六從無作專者安有傳俱作傳

之誤字依此言之甘卒與潘氏十卷必非同出一版沈乾盧又  
謂潘本快草漫漶乃當時坊刻讎校未精翁曾溪嘗  
為南宋末書實所重刻江鄭堂又疑為浚儀重刊本  
語當可信且是本字體勁秀筆畫謹嚴鑄工極整  
飭絕無恠草之迹是非浚儀重刊必為龍舒初版  
矣洪邁容齋四筆云趙德甫金石錄其妻易安李  
居士作後序今龍舒郡庫刻其書而此序不見取  
是本無易安後序是亦一證也原書中縫屢記書  
寫人龍秀姓名刻工亦記有數人惟書曾受水墨  
痕汗漬摺紋破裂裝工不善補綴致其他字迹多難  
辨認未能據以考訂刊印時代為可惜身趙敦甫  
世講得之南京肆中以此罕見珍本不願私為己有

屬代鑒定並附題詞將以獻諸中央人民政府蒙古奉  
公至堪嘉尚爰抒所見質諸敦甫兼就正於世之讀者  
辛卯五月節日海鹽張元濟





返暮

孝義公小像一帋留為將來傳像之用



熙寧金陵甘氏津逮樓藏書十餘萬卷夙著聲聞

主人夢六先生名福字德基為佳嘉道間東南收藏家之一

自來談藏書故實者蓋莫不稱道及之無獨贅述

先生遺像經亂散佚此乃哲嗣者壬學博名追募留

為傳像之用原摹本最近津逮叢殘流播寧滬車轉

傳海內孤本宋刊初印趙明誠金石錄輾轉為贛人

趙敦甫先生世暹所得趙不自秘慨然公之北京圖

書館用意甚盛而此像原摹本二樣在他項殘書

中流入趙許趙孟惠然歸還其子姓俾永保之意亦

特厚慰農學士

名滂者  
壬子曾孫

敬謹影摹一幀奉酬以誌

紀念云金陵周良熙庶成甫識

壬辰立秋節日  
時年七十有五

